

四庫全書

史部

欽定四庫全書

續資治通鑑長編卷二百八十

宋 李燾 撰

神宗

熙寧十年春正月壬子朔以才人朱氏為嬪好 秦鳳
路轉運司言茶場司歲供熙河糴買近雖折以茶而價
高不售今屯聚兵馬用度極廣欲借次年數聽減價變
易上批轉運司急於得錢多減茶價則一時售者既衆

蕃漢積茶猥多必壞茶利兼妨買馬如不得已可與一
限數乃借支茶場司茶為錢十萬緡付之 上批安南
行營軍前動靜朝廷欲日知之可令權發遣邕州事周
沃日具以聞遞角後別用長牌大書樞密院急速文字
毋得入鋪

庚申知制誥新知荆南章惇知湖州初惇自湖徙荆南
仍令親至辰沅州安撫叛蠻受命即倍道疾馳道中墜
馬傷足遂自陳開辰沅州事已定乞二浙一郡上批可

還惇前任故也

熙寧八年十月惇自三司使出知湖州九年十月移知荆南惇本傳云出知湖

州荆湖蠻復擾邊移知荆南至則事平以親老再請湖州

中書言近許市易司與

江南西路轉運司允洪撫等五州軍鹽和買紬絹及差屬官歐陽成總領以鹽引從便移易與轉運司財賦并場務課額有妨欲令以諸州所支和買鹽數委轉運司相度裁定罷還市易務所差官從之 權發遣荆湖南

路轉運判官唐義問言北路近年廢荆門軍為長林縣隸江陵府此軍控制巴蜀備防百越今以為縣城郭不

完屯兵減少不足以控制要會比者奉使訪察之臣惟以興事塞責減放役人椿留役錢為利聞自廢軍以來鹽酒課息每歲虧數過於所存役錢乞復建軍詔荆湖北路監司相度以聞既而不行御史彭汝礪言乞約東刑部毋得以公事疑難為名巡廳商量詔法寺有疑難公案並具刑名并執見不同申中書樞密院方得稟白令御史臺覺察禮院言今以慶歷五年以後祠祭沿革參酌編修成祀儀三本乞一本留中餘付監祭禮

司從之賜判太常寺陳襄等銀絹有差

賜銀絹自三月十九日移入

詔借河北路災傷五分以上戶麥種戶一石 成都

府路鈐轄轉運司言乞修安遠城樓櫓移威遠軍就彼

從之

當考朱本與墨本並同

知成都府馮京乞修永康軍城及

移蠶崖關於溪谷口其城逼近大山夏秋多雨土性疎

惡易摧乞壘以埽石從之 知賓州殿中丞古亘勒停

坐聞交趾將為寇避亡出城也

癸亥廣南東路轉運司言軍興之際州縣闕官欲令江

西十州軍見任京朝官選人大小使臣各依合入資序
指射本路員闕上銓院奏差從之 侍御史周尹言臣

累曾奏李穰為事乖謬不可處之監司乞停穰職事及
治其父死不葬之罪廢棄終身至今未蒙指揮施行近
訪聞河北西路提刑司體量到穰指實事理與臣所言
並同却奉聖旨劄與李穰知臣初得其說固不以為信
蓋朝廷往時嘗有兩禁臣僚素抱才業累歷清近時名
朝望人主所知偶為言者舉劾暴其罪狀而傳聞未審

曖昧不明虛實為疑情或可恕即有聖旨劄令本官知而稷擢自冗僚地輕資淺非在兩禁清近也所至官守曾無廉譽非負時名朝望也本道按刑已究見實狀非傳聞不審也二十餘年不葬父惡逆最著非曖昧不明也今中外傳報已有上項指揮稷何人斯乃獲幸免夫監司之職表帥一方郡縣觀其政而輕重朝廷信其言而賞罰官吏其任之也既殊他職其責之也宜異衆人若受委非才罪愆已著尚加函貸實虧公論臣職忝風

憲以澄清為先如稷所為尤宜彈治朝廷或謂稷小官
不足數小事不足問即異時臣僚間有所任官資比稷
為稍重所犯罪惡校稷為可疑則言事之臣慮朝廷復
不聽察孰敢冒怨仇而論之者乎伏望檢會臣前後劄
子并奏狀特賜指揮將稷早行責降使臣私心無愧獲

安職分

中書時政記正月十二日市

甲子皇第七子生遣岐王顥告于太廟价雄州言北

界巡馬過河以來敵情難測忽有奔衝則知縣縣尉弓

手不多勢力難敵自今遇有巡馬許呼集應接人馬授
甲於駐泊都監聽排敵於西北門裏以備非常從之

詔已差官修築河北破缺塘隄收櫃水勢其信安軍等
處因塘水減涸退出田土已召人耕佃者並令起遣仍
差河北東路提點刑獄韓正彥同屯田都監謝禹珪檢
括畫圖以聞 詔安南行營諸軍病死及戰歿之家所
借衣賜料錢並與除放衣賜毋過一季料錢毋過一月
弓箭手民兵義勇等貸借官物於合展限外更展一年

詔諸寺監丞並堂選更不舉官 詔權發遣京東東路轉運判官太子中舍李察展磨勘四年權京西南路提點刑獄殿中丞張復禮知魚臺縣李衆各展二年麻城縣主簿任祐之前臨潁縣尉孟厚各衝替坐檢計保明開鄧艾口新河不當也

戊辰仙韶院火撤屋二百五十楹上不御朝

己巳白虹貫日 詔以內藏庫絹十五萬匹銀五萬兩

賜熙河路經略司以脩軍賞 瓊管軍員趙秀為三班

差使兵士周元等十四人各轉三資賜絹有差以廣南西路經略司言秀等為交趾所獲秀率元等竊兵仗由海道投廉州又為黎峒所執至是來歸故賞之

去年十月六日

當併

入

庚午提點開封府界諸縣鎮公事太常丞直集賢院蔡確為侍御史知雜事詔羣牧都監自今與副使互置近已除張誠一副使宋有志宜罷其闕更不差人詔祁定州民欠市易水利淤田司結糴糧可止依常平法

出息二分納錢仍仰逐司見計置河北三處封樁糧草
自今止乘賤以錢收買

壬申宰臣吳充以提舉詳定刪修軍馬司編敕成賜銀

絹各三百刪修官改差遣減磨勘年有差

八年二月
三月初修

癸酉詔諸路村不及五戶別村遙遠者許通附保戶

甲戌六宅副使宋用臣遷內藏庫副使依舊寄資入內
供奉官李直清殿頭馮永清王獻章各減磨勘七年入
內供奉官任端減五年餘賜銀絹以修內城畢也

乙亥詔發法寺自今公案半年一次赴中書門下勒宿斷絕仍比較功過依三等支賜

丙子知河中府兵部員外郎直史館陸經為集賢殿修撰再任以上批河中府有王孝先創置官莊及淤田私鹽等事須藉長吏協力應副聞經在彼盡力可優獎令再任故也 詔成都府路轉運使俞充陞一任轉運判

官段介各減磨勘二年以知成都府馮京言茂州蕃賊叛充等應副辦集也尋召充權判都水監

判都水監在三月二十三日

日 詔近降指揮河北河東廢監賣牛馬并租課牧地
錢等今於太原大名府送納除去府三百里內者可依
前指揮外在三百里外者即於所屬州軍寄官令羣牧
司召人入便於本司封樁 屯田郎中勾當步軍糧料
院趙令鑠言父世雄於祖宗為元孫乞同父母賃宅外
居詔許令鑠入宮省覲

戊寅詔前光祿寺丞知秀州華亭縣張若濟貸死杖脊
刺面配沙門島權兩浙轉運副使度支郎中王廷老管

勾文字大理寺丞郭附追兩官勒停提點刑獄司封員
外郎晁端彥職方員外郎潘良器追兩官發運司勾當
公事祕書丞胡志忠追一官並免勒停依前勅衝替前
知華亭縣大理寺丞上官汲太子中允邵竒贊善大夫
呂溫卿並衝替都官員外郎分司南京施邈責授舒州
團練副使試將作監主簿鄭膺柳州編管先是蹇周輔
李竦同鞠若濟獄溫卿等皆就劾於是獄具若濟坐枉
法贓而汲竒所言有不實者溫卿以田契屬若濟質華

亭庫戶錢五百千貸舊任嘉興弓手錢四百千申轉運
司不候年滿勒民贖田邈倚轉運使張靚勢託在任官
買物違法及沽酒入禁地志忠嘗預廷老等大教妓樂
宴會案問欲舉膺詭名射民田為僧文捷法英求住杭
州上下天竺院廷老靚以膺呂惠卿之舅干請必從又
以附惠卿之妹夫差權知崑山縣三日撓奪已差權官
職田米四百餘石詔特斷之仍追附所得米入官靚以
他事別劾獄未上也

要考靚後
如何斷

膺挾惠卿勢橫兩浙人

皆呼鄭六舅或言周輔初按得呂氏姦利事推治甚急
會鄧綰敗呂氏家人饋藥名藥曰綰出湯因以告周輔
周輔得之遂不肯為王氏盡力抹殺呂氏事而上其獄

云

十朝綱要云正月戊寅張若濟獄具若濟坐受民吳
湘銀九百兩等罪杖脊流海島本路轉運副使王廷

老提點刑獄晁端彥等坐累降黜有差獄初起事連參
知政事呂惠卿御史中丞鄧綰發其狀上一再遣使往

秀州究實至是惠卿弟溫卿亦坐罪惠卿家傳云云

已附注八年九月二十六日時政記載此獄并鄧綰蔡

承禧鄧潤甫等章及惠卿訴狀甚詳今但從實錄曾布

元符元年日錄八月二十七日癸酉上諭布安惇言呂

升卿發上官汲事有所挾已令移京西推勘布亦以為
當然上因問秀獄事及言蹇周輔為獄官觀望不決及

鄧綰貶呂溫卿在獄家人以綰出湯與之周輔等遂平反惠卿獲免而溫卿猶勒停若非綰及安石出惠卿必不免上曰自來刑獄只如此又問鄧綰論事薦人事悉以實對

權御史中丞鄧潤甫

言應不以赦降去官原減乞令重修編敕所及司農寺擇可刪除者先詳定從之又言朝廷向者簡求人才俾之守郡故有自通判資序而超遷者亦有例入知州而以病眊疲軟罷之者雖怨叢政府而州郡往往得人夫取怨於一二人而千里之民蒙其惠利亦溥矣聞近欲矯其弊將案審官格與之如此則病眊疲軟且將復用

雖足以得一二人之心而千里之民有被其患者儻以超陞通判為僥倖則裁損之可也至於郡守乞依向時考觀選擇以便元元不報

己卯遣侍御史周尹乘驛齎御香往嘉州峨眉山白水寺以上批兩川豐稔尹常言有母在成都市可因奉使令迎侍故也尹言乞下廣南西路宣撫司根究交趾畧去人從之 宣撫司言廣源州初為州須兵防托乞依熙河沅州例配罪人為牢城詔出自淮以南州軍配罪人

並配廣源州 郭達等言乞就差廣南西路提點刑獄
提舉興置廣源州等處金銀坑冶從之

庚辰詔開封府判官吳幾復劾東頭供奉官王永年以
永年詣宰相訟宗室叔皮等易衣私出求卜宰臣王珪
言永年嘗言宗室與臣是親蓋臣妻父鄭戩兄載女嫁
楊億之子紘紘子馘非鄭氏所出馘有女嫁宗室叔兼
故永年言與臣親今永年所論言涉不順乞下有司推
究有無與臣相涉事免惑衆聞從之永年妻叔皮女弟

永年自江南罷官押錢網赴京師盜用數千緡冀妻家
為償之叔皮不為償三司督錢甚急永年知叔皮嘗於
上元夜微服遊閭里乃夜扣東府告變云叔皮兄弟私
訪卜者謂已有天命謀作亂密造乘輿服御物已具故
命幾復鞠之幾復按驗皆無狀永年既服罪會病死獄
中侍御史周尹言近制太廟太祠並差宗室使相以
上攝太尉行事所以重宗廟尊祖考親皇族訓子孫也
去冬臘享及期中書方欲出敕有宗室遽在告既別差

官翊日即奉朝請亦有受誓戒後復辭疾者竊惟宗室親賢蒙九聖積累之烈已極尊崇顯寵矣所宜春秋致力以舉典禮今乃以一日奉祠為憚則是恃德棄本莫甚於此豈非博士不喻以禮有司不示以法之過歟臣謂宜申約束自今宗室使相合赴太廟行事者毋得臨時以疾苟免委宗正司舉劾如謂宗室使相以上員數不多祠事頻數即差節度使以上通攝從之詔淮南等路近團置將兵若委州府必不能整辦可選武臣二

員令往點閱招增簡補其約束令承旨司檢會取旨於是差西上閤門副使張山甫莊宅副使高遵一給事

中程師孟罷判將作監歸班以奉使至涿州南高排坐

次不當遣人計會改正不從因託疾不赴北亭餞送涿

州移牒言其不循故事也初詔特罰銅十斤放翌日乃

有此命

前此遼主及其母俱賀生辰故遣使者兩番至遼地相與坐則接伴者南鄉西上左番南鄉東

上涿州官西鄉右番東鄉及遼母卒師孟始至涿州遼為坐圖接伴使副俱南鄉涿州官西鄉而本朝使副東鄉師孟曰如此則中國之使卑矣自日昊至暮爭未決從者失色而師孟詞氣益厲叱價者易之乃更以接伴

者西鄉本朝使副東鄉而涿州官南鄉明日涿人餞于郊疾馳過之不顧涿人以師孟不與餞禮移文雄州故責之此據師孟本傳所云改坐次與實錄不同當考密院時政記載師孟不赴北亭餞送事尤詳然亦不足載

辛巳詔天章閣待制楚建中罰銅三十斤坐前知慶州賑濟饑民給散錢糧不當去官特斷也先是范純仁代建中知慶州擅發常平封椿粟麥取卹流亡多所全活會蓬生蔽野結實如粟公私取給焉復為營求耕稼之具歲以大穰或言純仁稟貸過多遣使按視民聞之爭先輸官比使者至則已無負邠寧間有叢塚使者發塚

數骸効純仁全活不實之罪詔窮治乃建中所封也朝廷即欲移罪建中純仁連奏建中循守法度方申請措置而民已多餓死及臣因其措置偶免流亡非臣才術能然也况建中頃坐無狀罷去朝廷既責之今緣按臣罪而又及建中是一罪再刑也建中竟不免罰銅千牛衛將軍不欺免死及除名奪一官勒停不欺十六歲父士會為宗正司追證士焚詬罵事不欺例當勒住朝參以父病乞就家取問乃懷表闌入垂拱殿唐突自陳

法當不貳死罪上憫其情薄責之

二月壬午朔詔河北京東提點刑獄司體量賊盜多處
州軍長吏如罷軟不職及措置乖方并捕盜官不足任
者選官對替訖奏 侍御史周尹言昨彈奏李稷為河

北轉運判官任情不公及不葬父事乞早責降詔李稷

改軍器監丞

九年十月五日尹初言
今年五月十二日又言

羣牧司言去年

給安南行營及支兩省宗室諸班直諸軍諸司馬總三
千餘匹未支者尚二千餘匹在平日已不足乞裁損宗

室已下所給馬數諸司停給從之

紹聖三年七月六日張赴等云云可考

甲申崇信軍節度使知宗正事宗旦為右僕射同平章事准康軍留後宗誼為昭化軍節度使彰武留後承選為保大軍節度使 兵部郎中直史館提舉醴泉觀陳汝羲為集賢殿修撰知福州汝羲以足疾免許之 工

部郎中直龍圖閣判將作監謝景溫為鹽鐵副使景溫辭以知滄州工部郎中直龍圖閣李復圭代之 詔京東災傷州縣巡檢縣尉不依常制選材武人 詔中外

禁軍已有定額三司及諸路計置請受歲有常數其間偶有闕額未招揀人充填者其請受並令封樁毋得移用於次年春季具數申樞密院

乙酉詔方春民間乏食穀價稍長權停增價折納欠負以俟豐稔又詔軍頭司無引見公事毋得入殿門見勾當官非都知押班閣門使副有合奏事即具榜子以聞詔秦鳳涇原路經略安撫司闕來年春衣錢許於封樁錢內借支却於永興軍路鑄錢監鑄到錢內撥還

丙戌知荆南章惇言伏見詔劾荆南澧州應副廣西糧
草違法官吏開所買草不致虧百姓今已詔貼給其直
又劾官司恐自今緩急軍期豪猾之家不肯中賣以待
厚價官吏畏避各求苟免則難辦事詔釋之 詔廊延
路經畧司如西界修小堡寨更不牒問若違誓詔修建
城池當牒問即奏候朝旨自今諸路移牒宥州除常程
事外準此 詔蠲鄆州助教李君升所負錢千八百緡
以君升嘗乞置密州板橋鎮市易司出息二十餘萬緡

乞蠲舊逋為賞故也

丁亥駕部員外郎熙河路相度官莊霍翔乞先次熙州城下營田出租地百一十頃置官莊差見任京官選人使臣勾當弓箭手共治從之仍以翔提點秦鳳路刑獄

兼提舉官莊

本志云凡言實邊者營田本趙高官莊本霍翔元豐元年七月一日翔陞任

詔京東西路權發遣轉運判官公事李察特展一任滿日落發遣察前任嘗被責審官院以格當升故有此旨戊子以充容邢氏為婉儀熙河路經略司奏洮東安

撫司言果莊結連南北諸羌入寇岷州城寨占據鐵城
誘脅青唐等族日夕搖動已有附賊者崇儀副使知岷
州种諤與東頭供奉官走馬承受康識計議十一月辛
巳帥兵赴和爾川寨翌日至鐵城遇賊斬首八百八十二
級及殺總噶爾首領等本司勘會果莊引總噶爾之兵驅脅
熟羌深入寇邊賴包順馬忠密請出兵諤識能用其言
將佐協力迎擊取勝詔諤遷引進副使識改一官與閤
門祗候皇城使包順馬忠並遷遥郡刺史順康州忠達

州各與兩子恩崇儀副使趙紹忠為內藏庫副使趙醇忠為六宅副使文思副使魏慶為左藏庫副使西京左藏庫副使包誠為供備庫使餘遷官減年有差識河南人也 詔選人磨勘改京朝官初任須入知縣雖不拘常制不得舉辟 又詔河北京東轉運司彊盜罪至死該案問減等者未得斷具析以聞候盜賊稀少日取旨以強盜多因案問減死配他郡逃還鄉里讎害告捕之人人不敢告捕而盜賊益多故也 詔客省使英州刺

史達州團練使王君萬落客省使為引進使領英州刺史依舊熙河路副總管岷州團練使捧日天武四廂都指揮使知熙州高遵裕落捧日天武四廂都指揮使知潁州祠部員外郎集賢校理知河州鮮于師中落集賢校理監閬州商稅權發遣秦鳳路轉運副使屯田郎中張穆之太子中舍通判岷州黃察各追兩官勒停餘官克替坐違法結糴及回易公用也

九年四月三日
蔡確乘傳劾獄

己丑校書郎張采為殿中丞賞捕盜功也 成都府利

州路安撫司言茂州緣邊接近蕃界自來人戶蓄藏兵器有禁昨蕃賊叛無以扞禦乞稍捐此禁詔綿漢邛蜀彭州及永康軍接近蕃界戶除禁兵器及甲弩外計置其餘兵器仍經官注籍非緝捕賊盜毋得持入禁地河東經畧轉運提舉司上義勇保甲赴巡檢縣尉以近便番次上番法從之

辛卯詔以監修在京諸倉畢功提舉官司封員外郎劉昭遠司勳員外郎沈希顏各減二年磨勘侍禁張永德

等酬賞有差

是日

辛卯
十日

日中有黑子如李至乙巳散

乙巳二十四日此據實錄並
舊紀至乙巳散新紀削去

癸巳翰林侍讀學士兼寶文閣學士提舉崇福宮呂公
著知河陽公著再任崇福及是乃起為州錄前大名府
臨清館陶縣巡檢殿直關懷寶二子並為三班差使賜
名守忠繼忠仍加賻卹以懷寶與賊王成鬪死故也

詔以光州固始縣戶絕田賜國子監膳生員太學西門
修築射圃聽諸生遇假日習射並從管勾國子監黃履

請也

甲午詔春候已深無甚寒凍高麗使非久起離令都水
監趣五七日開汴口 詔宗室使相雖及十年更不取
旨磨勘先是宗諤自請磨勘中書檢宗室著令凡有所
乞並申大宗正詳條例以聞宗諤當罰俸詔釋罪而有
是命是月宗室諸衛大將軍以上磨勘遷官者一百二
十五人

遷官數自月末移入選舉志云是歲今從實錄

詔秦鳳熙河路計議

措置邊事李憲畫定岷州界至

乙未奉禮郎呂和卿為軍器監丞仍詔丞主簿自今於
所置員數互換選人 南劍州沙縣尉許公孫為奉禮
郎賞捕盜功也 權御史中丞鄧潤甫言嘗有興利之
臣議前代帝王陵寢許民請射耕墾而司農可之緣此
唐之諸陵悉見芟刈聞昭陵木已剪伐無遺熙寧令前
代帝王陵寢並禁樵採遇郊祀則敕吏致祭其德意可
謂遠矣小人培克不顧大體使其所得不貲猶不可為
況其所獲至淺鮮者哉乞下所屬依舊禁止樵採耕墾

并糾責創議之人詔唐諸陵除立定依條禁止頃畝外

其餘民已請射地許依舊耕佃為守陵戶餘並禁止十二

八日熊本呂嘉問等並坐展磨勘年

御史彭汝礪言竊聞京東河北盜

賊不禁至白晝殺人於市攻畧鎮邑執縛官吏流聞四

方非所以為朝廷重也比聞巡檢縣尉許不依常制舉

差然巡檢縣尉職在追胥指縱則有待焉臣觀漢京兆

多盜起王尊於久廢渤海驚擾用龔遂於垂老使諸郡

得人如尊遂則亦不至此矣其盜發州郡乞選擢仁明

智略之吏更領州事稍寬繩檢使隨宜處置且令明以
德音撫諭厚設購賞使其徒自相首告捕殺則其黨易
潰矣又言自北來者累有詣臣言河北歲比不登民散
徙者衆去秋旱涉冬少雨雪春夏之交民必乏食夫民
無食而有司不加卹焉是棄而為寇資也惟河北土地
堅勁風俗喜亂善盜什伍千百不待號召今其萌芽已
不可斬絕矣禍固有藏於隱微而發於人之所忽此不
可不戒也乞體量矜卹稍寬諸科率欠負以安下戶使

柔良懷恩而無離叛之心則姦凶寡耦而有衰止之勢矣 詔蕃巡檢殿直閤門祇候劉永年落閤門祇候坐不覺劉勃怡與夏國作姦細也

丁酉詔諸州歲以十月差官檢視內外老病貧乏不能自存者注籍人日給米豆共一升小兒半之三日一給自十一月朔始止明年三月晦 詔差近上內臣一員管勾同文館遇高麗入貢依都亭西驛例排辦從館伴

高麗使謝景溫等請也

政和元年四月十日可考

己亥樞密副使禮部侍郎王韶為戶部侍郎觀文殿學士知洪州韶時以母老旬外因抗疏言臣前日面論決里廣源州之事以為大臣圖國事不當貪虛名而忘實禍捨遠業而先小數執政乃疑臣有所譏刺此臣之私意所以鬱而未伸也方安南舉事之初臣力爭極論欲寬民力而省財用者多矣但執政莫肯聽用每聞臣言則必以熙河事折臣然本欲不費於朝廷而可以至伊烏魯幹初不欲遽令熙河作路河岷作州廣費以自累

也臣昨屢與王安石爭熙河劾獄今重以決里事與執政異論臣若不自求退他日必致不容又言李憲欲聚兵六萬人為攻討計臣以為用衆不如用寡兵多則與糧競兵少則與敵競願悔安南之舉懲艾於河西韶鑿空開邊以軍功至執政乃專以勤兵費財歸曲於朝廷上不悅故出之

魏秦東軒雜錄云熙寧十年京師旱上焦勞甚樞密副使王韶言昔桑弘羊為

漢武帝龍天下之利是時卜式乞烹弘羊以致雨今市易務衰剝民利十倍弘羊而比來官吏失於奉行者多至黜免今之大旱皆由呂嘉問作法害人以致和氣不至臣乞烹嘉問以謝天下宜甘澤之可致也此事當考

京師旱乃七年事詔言
惠呂嘉問乃雨當考

環慶路經略司言已差鈴轄

种古赴肅遠寨從便宜處置作過蕃官英博等詔厚購
賞捕為首之人脅從蕃部並釋之經略司仍厚加招撫
樞密院言安南病死士卒其弟姪子孫尚幼者給公
據出營俟十五歲以上有司驗公據合給廩食從之

壬寅侍御史周尹言荆湖南路轉運副使朱初平與判
官趙楊帥兵即楊光僭所居築城寨蠻人拒不聽殺傷
官軍圍初平等凡三數日乃得還取輕外夷乞先罷初

平監司委官體量虛妄生事重行絀降詔候入內供奉
官張懷德使還取旨既而初平奏因出巡撫宿楊晟照
家蠻數百驚疑擁道乞赦罪尋已權宜安存還武陽寨
訖 詔廊延路蕃漢弓箭手及募兵自安南回者並許
引見推恩 詔廣源知州通判簽書判官鈐轄都監監
押並遷一官候及一年更遷一官任滿陞一任幕職官
錄事參軍判司簿尉知縣候任滿各推恩戶曹兼理法
以正攝官文學長史等充任滿與令錄優其請給更與

驛券以收復廣源机榔置郡縣人憚行故也 詔永興

秦鳳等路轉運使副判官並兼提舉銀銅坑冶鑄錢提

點刑獄司更不兼領 環慶路經略司奉準朝旨分析

已牒廊延路經略司指揮保安軍移牒宥州問創修城

寨因依本司近為探得西界欲於嘉禾永宗廣聚材木修

置城寨緣去本路邊界咫尺慮彼處愚幼不知謗詔明

文久遠別致邊患遂不暇奏取朝旨分析是實奉旨范

純仁特放罪

此據密院時政記
十一日事今增入

甲辰侍御史知雜事蔡確言京東河北盜賊結集久未殄熄乞自朝廷選官分往逐路點檢捕盜次第從之仍委提舉官點檢前原州臨涇縣令張維除名送康州編管翰林醫學趙渙勒停西上閣門使知鎮戎軍張守約等九人並奪一官以維受趙渙等賂賒貸官錢帛與人及守約等請求維賒借違法已更赦特有是命九年四月蔡確乘傳劾獄詔河東轉運司本路堡寨并巡檢要切去處闕官許選擇有心力材武使臣權管勾

乙巳詔自今虔州知州更不帶安撫鈐轄依舊令洪州知州兼領

丙午宰臣吳克等上表賀安南平 曲赦廣南西路諸州軍官吏起發及部押般運官物丁夫稽程有所規避誤師期者具案奏裁餘罪咸赦除之安南道經略招討都總管荆湖南路宣撫司並罷行營軍馬除量留防守外盡放歸本路經賊坊郭鄉村戶及避賊失業者并被殺土丁之家去年已放稅者更放今年并二稅役錢已

免兩料者更免兩料應經賊殺戮之家見存丁口孤貧不能自存者所在州軍日給口食米十五歲以上一升半以下一升五歲以下半升至二十歲止應募弓箭手民兵義勇土丁効用軍前者今日以前諸欠負並除放

以廣源州為順州

舊記書兩午郭遠敗交趾於富良江屯兵逗遛不進李乾德奉表降復廣

源州赦湖南路囚罪一等徒以下釋之民應征役者優恤之新紀書以復廣源蘇茂等州羣臣表賀赦廣西囚

罪一等徒以下原之賜行營諸軍錢民沒征役者卹其家以廣源州為順州赦乾德罪許修貢如故當從新也

河南程氏遺書蘇昞云正叔論安南事當初邊上不使令逐近點集應急救援其時雖將帥革兵冒涉走瘴朝

廷以赤子為憂亦有所不恤也其時不救應故令縱恣
戰殺至數萬今既後時又不候至秋涼迄冬一直趨寇
亦可以前食嶺北食積於嶺南般運今乃正於七月過
嶺以瘴死者自數分及過境又糧不繼深至賊巢以械
度五百人過江且斫且焚破其竹寨幾重不能得復棹
其空棧續以救兵反為賊兵會合禽殺吾眾無救或死
或逃遂不成功所爭者二十五里耳欲再往又無舟可
度無糧以戍此繆算未之有也猶得賊辭差順遂得有
詞且承當了若使其言猶未順如何處之運糧者死八
萬戰兵瘴死十一萬餘得二萬八千人生還尚多病者
又先為賊殺戮數萬都不下三十萬口其昏謬無謀如
此甚也此段字有錯誤姑附注此當考詳或可增修

賜李乾德詔許依舊入貢送還所掠省地人口是役也
上批令中書樞密院具行營兵馬數兵四萬九千五百

六人馬四千六百九十疋除病死及事故見存二萬三千四百人馬三千一百七十四疋 安南道行營馬步軍都總管經略招討使宣徽南院使郭達判潭州副使天章閣待制趙高知桂州起居舍人知潭州曾布為集賢院學士知廣州直昭文館知桂州石鑑知邕州 詔河北河東路不許以銅及盧甘石博買通入蕃界 又詔自今成都府梓利夔州路知州通判不得並差川峽人

戊申詔新通判澧州比部郎中張淑與小處簽判官以
審官院言淑人品凡陋不材也 詔自今省寺等處按

劾府界諸縣鎮公事並關牒開封府或提點提舉司施
行府界官如省寺等處牒請入京及有公事取稟並先
申中書候指揮仍往京不得過十日 三司言奉詔同

制置解鹽使皮公弼詳議中外所論陝西解鹽鈔法利

害 去年十一月十一日詔也會要載此詔却無此利害
中書時政記載詔并利害畫一特詳今但依實錄

蓋鹽法之弊由熙河鈔溢額鈔溢額故鈔價賤鈔價賤

故糧草貴又東西南三路通商州縣權賣官鹽故商旅不行如此鹽法不得不改官賣不得不罷今欲更張前弊必先收舊鈔點印舊鹽行貼納之法然後自變法日為始盡買舊鈔入官其已請出鹽立限許人自陳準新價貼納錢印鹽席給公據令條具所施行事東南舊法鹽鈔一席毋過三千五百西鹽鈔一席毋過二千五百盡買入官先令商人以鈔赴解州權鹽院并池場照對批鑿方許中賣已請出鹽立限告賞許商人自陳東南

鹽一席貼納錢二千五百西鹽一席貼納三千與換公
據立限出賣罷兩處禁權官賣其提舉司出賣鹽並依
客人貼納價錢充買舊鈔支用取客人情愿對行算請
從省司降篆書鹽席木印樣委逐州軍雕造付所差官
點檢印記給與新引將京西南北秦鳳河東路在京開
封府界應通商地分各舉官一員其全席鹽限十日內
經官自陳點印貼納委所差官點數用印號毀抹舊引
給與新引其貼納錢許供通抵當如商人願以舊鈔依

估定價折會貼納鹽錢者聽從便於隨處送納抹訖封
印送制置司若私鹽衰息官鹽自可通行民間請出兩
路鹽無慮三十五萬席比候民間變轉約須期年慮緣
邊未入新法鹽錢糧草有闕乞權於去年折納欠負穀
粟計物價借充軍糧候入到鹽錢依數撥還通商州軍
縣鎮歲終委轉運提點司各以管下民戶多少同者將
繳納商人注賣鹽引多少為準比較增虧依編敕江淮
等路賣鹽酒比較賞罰詔除提舉出賣解鹽司官賣地

分別降指揮外及市易司已買鹽亦依客人例貼納價

錢餘依所定

凡通商州軍在京西者為南鹽在陝西者為西鹽若禁鹽地則為采鹽其詳具天聖

八年十月

司馬記

聞載皮公弼言官賣鹽無利此稱

官賣不得不罷當改其事然詔云官賣地分別降指揮

則是官賣不全罷也三月十六日指揮當即是別降者記又差誤具注八年閏四月十八日御史劾額外鹽鈔

在九年二月六日

沈括自誌曰先此陝西鹽利亡其大半未有

以救其弊括言具為鹽之蠹者其說有四其一民足於

鹽歲不過三十五萬囊為錢二百一十餘萬緡而已是

時乃出鈔三百五十萬緡鹽有常費而出鈔無藝此鈔

之所以輕也實用之外可益二十萬緡以備水火敗失以二百萬緡為歲常無得加焉鈔自無低昂其二池鹽舊分東西路西鹽下東鹽之價囊千錢欲勝塞外之姦鹽卒不可止而徒抑西鹽之價以傾東鹽之利西鹽日流於東路而東鹽益不售守疆之吏不能禁也括請合東西之價為一而省畫疆之吏兵數百其三出鈔委之解鹽司外司常持損益之柄不計三司之有無鈔輕則又出度支錢以斂滯鈔故中都之藏日虛而鹽之出者

歲溢括請外司惟謹具出納而制鈔之本歸之三司其
四制諸司之鬻鹽者同為一價無得低昂以兼商人之
利則歲售有常而蓄鈔可以為弊而滯錢藏於民者出
矣法雖已具而鈔之藏於民未有術以斂之於是閉池
無出鹽而以時價收宿鈔貸錢八十餘萬緡于少府以
斂滯鈔而公私之鈔悉上矣是時鈔為錢二千五百滯
鈔既上則為錢六千囊有三千五百之羨藏鈔者過幸
於是發五使分籍公私之鹽囊輸錢三千然後得貨民

得羨餘價五百而歛鈔之貸不失一錢而鹽利復貫度
支歲糴河北邊粟三百萬緡悉為東南鹽鈔而權貨務
日入鈔之利萬緡以為常是時纔得千餘緡括以其原
生於法出於多孔省寺羣有司或借鹽鈔而陰用以易
百貨稱貸入息自制高下之價民趨一切之利而度支
之鈔益輕諸道轉運司得用田廬券契質鹽人不持一
錢搏手以取萬鈞之鹽豈復賴度支之鈔又四方上太
府錢募民入資太府執券以受錢于外州以省轉送之

費此雖為利而不知民樂應募而鈔鹽不售鹽所以生財利出於海而無窮不售則為朽壤錢雖未入太府而藏於外州其實皆在也獨費將送而已閉便錢之路而專以售鹽為利者不知民食鹽有常而為鈔歲蔓則陝西折估之弊復移於東南是二法欲相權當以售鹽為主而以便錢調其盈虛不可以一術御也三孔既塞而權貨萬緡之入不踰月而復括自誌措置解鹽鈔法當即是十年二月二十七日實錄所書者但實錄全載吏牘括誌稍文其言耳三十萬囊即三十五萬席也其四說第三說實錄乃於元豐

二年二月丙辰載之按括罷三司使具熙寧十年七月初九日括為三司使當即行其說不知何故實錄就括罷三司使一年後始載此也食貨第五卷十年三司言鹽法之弊由熙河鈔溢額故價賤而芻糧貴又東西南三路通商郡邑惟賣官鹽故商旅不行今鹽法當改官賣當罷請先收舊鈔印識舊鹽行加納之法官盡買舊鈔其已出鹽約期聽商人自言準新價增之印鹽席給符驗東南舊法鹽鈔席才三千五百西鹽鈔席減一千官盡買先令解州場院驗商人鈔書之乃許賣已請鹽立限告賞聽商人自陳東南鹽席加錢二千五百西鹽席加三千為易舊符立期令賣罷兩處禁榷官賣提舉司賣鹽並用新價錢充買舊鈔商人願對行算請者聽官為印識如法應通商地各舉官一員具全席鹽限十日自言乃令加納錢為印識給新引聽以舊鈔當加納錢皆行之而別定官賣鹽地詔市易司已買鹽亦加納錢已上十年二月二十七日三司言澶濮濟單曹懷

州南京陽武酸棗封邱考城東明白馬長垣胙城韋城
九縣雖使通商而為他鹽侵奪害於商販請復官賣便
河陽同華解州河中陝府陳留雍邱襄邑中牟管城尉
氏鄆陵扶溝太康咸平新鄭試令通商其入不及官賣
者官復自賣從之已上三月十一日又詔商鹽入京悉
賣之市易務每席毋減十千民鹽皆買之市易私與商
人為市許告沒其鹽已上四月十二日三司言皮公弼
鹽法酌前後兩池所支鹽數歲請以二百三十萬緡為
額已上四月二十三日又詔京師置七場買東南鈔而
市易務言為錢五十九萬三千餘緡三司言闕錢頗還
其鈔令賣之於西買者其三給錢其七準緣邊價給新
引庶得民間舊鈔而新引易於變易詔用其議已上四
月二十四日實錄無制置解鹽使皮公弼請復范祥舊
法平市價詔假三司錢三十萬緡市鈔於京師已上六
月二十九日上嘗謂輔臣曰向以陝西用不足使市鈔
京師益欲權鹽價飛錢於塞下而出錢五百萬緡不能

救其弊也朝廷措置經始所當重謹便國者姑安靜以
持之已上元豐二年正月二十六日先是解鹽分東西
西鹽賣有分域又並邊州軍市芻糧給鈔過多故鈔及
鹽甚賤商旅不行官價自分為二於是三司及制置解
鹽司言鹽價東重而西輕請令西鹽得自便稍增價如
東鹽以平鈔法歲可增十二萬緡因復不分東西悉廢
西鹽約束解池鹽鈔舊以二百二十萬緡為額轉運使
皮公弼請增十萬以助邊糴至是又為二百四十二萬
三司又言商人已請西鹽宜令加納錢使與新法
價平兩議皆行之已上元豐二年二月十七日 詔

發正兵五千與廣南西路鈐轄司分擘戍守錄歸明人
儂善美孫惠談為三班借職以善美與子盛明往西農
州招呼人戶為賊所殺故也 詔司農寺丞及提舉常

平倉官並選嘗歷知縣縣令考課優等人 景福殿使
利州觀察使入內都知張茂則皇城使忠州防禦使入
內副都知藍元震皇城使達州刺史入內副都知蘇利
涉並降敕獎諭各賜衣帶以禁中遺火救護之勞也

詳定編修諸司敕式所上諸司敕令格式十二卷詔頒
行之翰林醫官院五廣聖宮一慶寧宮一大內鑰匙庫
一資善堂一後苑東門藥庫一提點軍器等軍一入內

內侍省使臣差遣一

此據會要增入藝文志同
十年正月二十七日事

已酉德音降廣南東路荆湖南路死罪囚徒以下釋之
應民戶被差役科配應副軍興者轉運司具戶所運物
多少地里遠近及戶所科物數奏當別優卹管押運物
赴廣西有少欠損壞見根究賠脩者如非侵盜並除之

新紀書赦廣東湖南如廣西路
紀但於丙午書赦湖南舊紀疎矣

舊

給事中知陳州

呂惠卿為資政殿學士知延州御史蔡承禧言臣自熙
寧八年四月莅職是時已聞參知政事呂惠卿兄弟布
滿朝廷宗立私黨所喜者雖無狀而被薦若曾旼李定

徐禧之類是也所怒者雖無罪而加黜若馮京劉載時
孝孫孫鼇朴之類是也加以阿蔽所親攀援無罪之人
以當罪罰惠卿之親方希益有罪而妄引朱溫其遂兩
罰金之類是也又顧指章惇等奏舉其弟如此之類言
之不能萬一而臣獨嘗憤悶力與明辨蒙陛下赫然罷
絀猶以給事中使守藩郡且惠卿自太子中允不四五
年至政府不圖報効而所為迺爾又頻為俚言妄瀆天
聽然臣之所論以為惠卿之罪不在於強借錢買田而

罪在於為大臣強橫紊朝廷法制昨秀州置獄偶爾網漏今寵以殿職付之邊任則後之為惡者何以懲沮又言臣嘗論呂惠卿恣橫不法前疏固已詳矣風聞或以為臣希王安石之旨而彈擊惠卿且臣熙寧八年四月蒙恩充御史五月六月以後即論其兄弟臣固不知惠卿兄弟何時失於安石邪計陛下必嘗知之然臣之與安石議論不同者故自不一若沈起李定沈季長徐禧之類皆陛下知臣之不與安石同也假使臣悅於躁進

如惠卿之心臣亦不至於希王安石之旨然臣頃者恃
陛下必能知此自不足辨今者伏聞惠卿纔滿歲即除
資政殿學士知延州乃知陛下前歲之詔而臣前日之
疏豈忘之邪臣始疑之而又有言者曰豈鄉者御史之
言惠卿強借錢買田事不涉惠卿而遂有此命乎此又
可疑也且前歲之責詔與微臣之劄子皆不及於秀州
之事何謂以此而除哉且臣之所言惠卿祇以竊弄刑
賞崇立私黨不循法理大臣之罪莫重於此故陛下幸

聽而顯逐之若秀州之事雖非臣所言然事亦有可以
情索者今張若濟得枉法之死罪而昔也何緣以出之
乎非惠卿通知外官何敢若此臣略舉此一事足以知
其獄之未盡然連歲禁繫證逮為多情實不忍安敢重
煩朝廷故臣亦不再言之臣嘗聆玉音嘗恨言事之臣
不能如仁宗之時奉承德音悸越震恐夙夕思所稱塞
而芻蕘之進惟此一事中外最為懼懾而臣未離憲府
惠卿已進職邊任臣恐先朝未嘗有此自斯以往抱義

戴忠之臣有為朝廷擊去強臣姦黨觀此或亦有怠而
以臣為戒者伏望陛下特回睿圖奮發宸斷罷去惠卿
之職任與之閑地使善良得安姦惡有懼天下幸甚否
則解臣御史之職以避惠卿之進毋使搢紳以臣故輕
視風憲之官不聽承禧前章時政記載之三月二十八日實錄因之未本以為無施行刪去
今依墨本仍移入惠卿除資政知延州後知延州寶文閣待制李承之檢

正中書五房公事

八年十二月二十四日知延州蔡承禧論因執政進退觀望政更劄子云

前歲李承之差知瀛州八年閏四月十九日而不往陛下嘗恨進人太速既得名位而使之不行臣嘗親聞德

音是惡其連進而強項不行濡戀於檢正五房也或者
以為王安石之所惡不知誠否名位既得而使之不行
此非但安石所惡蓋天下所甚惡也安石聞之而已人
皆傳以為安石之非又已差知延安故不必論今聞又
差檢正五房此天下之仕者不得不疑而觀望
也承禧又論二事姑存此要考承之本末也 權發

遣戶部副使度支郎中王克臣為集賢殿修撰知鄆州
初謀京東帥上令中書速選才堪治劇者一二人以名

聞中書言克臣及蹇周輔王居卿可使詔用克臣

新舊傳並

云元豐初京東多盜拜克臣鄆帥誤也熙寧末京東固多盜矣今從實錄並御集

皇城使康

州團練使知邕州陶弼為西上閤門使知順州初郭逵

以重兵壓賊境使弼將精銳殿後李乾德既納款達欲
班師恐為賊所襲不先號令而中軍夜起兵夫爭前自
相蹂踐賊隔江對壘陰伺之弼命帳下無輒動遲明整
隊徐引還達方築廣源城又使弼往視即奏用弼知順
州賊數入寇復據机柳縣揚聲欲攻州城弼率厲將士
固守素得人心賊動息皆知之獲覘者因令諭賊以禍
福不則來戰賊始懼順州以寧 詔知制誥熊本司勳
貲外郎呂嘉問大理寺丞高鑄贊善大夫曾孝綽殿中

丞石旦著作佐郎杜常張僅各展磨勘一年太常寺丞
集賢殿修撰張琥秘書丞莊公岳各展二年太子中允
王輔之前判司農寺張諤候將來叙用當磨勘日展三
年選人黃實闔令史邈候轉京官各展一年並坐申請
賣廟也 右正言寶文閣待制權判西京留司御史臺
常秩卒詔秩久以懿行見稱鄉里朝廷特起置之侍從
而恬靜自居不替素守宜優賻贈以勵廉隅贈右諫議
大夫賻絹三百匹秩起處士在朝廷碌碌無所發明聞

望日損為時譏笑


張師正倦遊錄載秩事頗多且云秩雉經而死王得臣塵史嘗辨其不然

今亦不取魏泰東軒錄云常秩以處士起為右正言直集賢院判國子監不踰年待制寶文閣兼判太常寺中問謁告歸汝陰上特降詔召之兩制降詔自秩始也會放進士徐鐸榜秩密以太學生之簿於行者籍名於冊貯懷袖間每唱名有之則揭冊指名進呈乞賜黜落如是者三四上方披閱試卷或與執政語往往不省秩言秩大以為沮遂謁告不朝一日翰林學士楊繪方生禁中俄有報太常寺吏人到院者繪昔常判寺立命至前乃故吏也詢其來之故即云常待制以謁告月餘未

有詔起令探刺消息楊曰此是禁中汝得妄入乎我若致汝於吏則連及待制汝速出無取禍先是秩未謁告時敕差謀向經奠事至是經奠百日上親奠祭護奠官例合迎駕秩不踈朝參而出迎駕於經門上祭奠畢登輦而去亦不顧秩秩愈不得意或告以不朝參而出就

職又嘗私覘禁中臺官欲有言者秩大恐遂以病還汝陰既而卒或云方卒時狂亂若心疾將自殺者然未得其詳泰所稱狂亂將自殺蓋與張師正所載略同欲追記秩納無行士人姓名當考林希野史載秩本末甚詳已附注四年四月甲戌希又云秩心疾月餘屢索刀家人防守之竟自刎死與張師正所記略同須更詳考無行士人蓋曹將美也希所載今附此希云九年三月上御集英放進士諸科館職校書皆入殿侍立此例久廢張芻請之上親閱試卷久之拆卷放徐鐸王任至第三錢適先賜第五人及第虛第三第四陞陳師錫張鎰以充之李格非自第四甲陞第一甲末鄧綰二子洵武陞第二甲洵仁陞第四甲曹將美者嘗斥出學既唱名常秩出白其事降本甲末放進士諸科特奏名考同五經三禮學究監薄文學長史六等濮州張傑者年九十三扶杖而來上特賜絹五十匹武舉人一與殿直次與奉職仍減年其下者與差使並賜紫祀牙笏銀帶乃

新例
也



欽定四庫全書

史部

續資治通鑑長編卷二百八十一至
三

詳校官檢討臣劉錫五

刑部郎中臣許兆椿覆勘

纂修官修撰臣黃軒

謄錄監生臣黃琮

欽定四庫全書

續資治通鑑長編卷二百八十一

宋 李燾 撰

神宗

熙寧十年三月辛亥朔分命輔臣祈雨上批安南行營
廊延路應募非食祿蕃兵及首領去家萬里以瘴死者
情尤可愍加賜絹有差內番官自來陣亡有例承襲者
即具合補職名聞奏餘但離陝西界雖未過嶺並依例

支給

甲寅贈宣慶使康州防禦使內侍右班副都知王守規
昭武軍留後皇城使忠州防禦使入內都知藍元震檢
身清修奉上勤謹十年左右始終不渝可並優贈故也

戊午詔著作佐郎前崇文院校書張載歸館供職載前
以尋醫去秦鳳路經略使吕大防請召還故有是詔

按綱

目云載自崇文歸館與諸生講學吕大防薦之召同知太
常禮院此云歸館供職秋七月乙卯始書其兼知太常

禮院與
綱目異

侍御史知雜事蔡確言鄭滑舊為輔郡屏蔽京師頃因
論者苟欲裁減役人廢以為縣所利者小所害者大東
西兩京相望數百里大河之南直抵都城並無州郡為
限雖有縣鎮形勢不彊非所以輔王畿重根本也臣以
謂鄭滑二州皆宜復置兼州廢尚近完復亦易不報

權御史中丞鄧潤甫言近聞增築廣源州選武臣為守
願先下本路安撫司令與監司熟計其利害條列一歲
凡用甲兵若干資糧若干甲兵調於某所資糧取於某

郡使兵足以勝敵食足以贍兵而無倉猝調發之艱則一方之民受賜而陛下無南顧之憂惟留意而審行之
詔安南應募諸路兵與免本路番戍一次 廣南西

路轉運司奏廉州言戰棹司舟船與賊戰鬪頗有殺傷
詔廣南西路經畧司如楊從先一行舟船未至即選使
臣量以兵援結從先亦言近收交趾偽命行軍招討使
李繼元牒并克伏後屢與臣戰鬪無恐懼詘服之意乞
嚴敕邊備以制非常

從先奏事乃此月二十五日今附此米本以無施行削去新本已復

存 詔自今川陝四路轉運提點刑獄提舉常平官不

得兼差川陝人 又詔諫官遇起居橫行諸處集會或

有職事與臺官通議聽於側近幕次往還

臺諫舊不相通司馬光建

儲帖可考相通或自此始更詳之

詔安南新克復廣源思琅等州可

差洪州等處威果等十七指揮往防托上批前日指揮

差張誠一都大提舉選差使臣教在京馬軍教頭可改

差內侍副都知王中正仍以中正為入內副都知

密記九月

二十三日可考元豐三年二月二十五日罷

已未詔邵州闕破寨同管轄兵甲三班借職秦用和子
瑜為借職以用和闕徽州等處道路為蠻人所害也

詔特選虞部員外郎畢仲熊一官專切管勾興置順州
等處坑冶從郭遼等所舉也

辛酉分命輔臣祈雨於郊廟社稷仍詔開封府界京東
西河北轉運提點刑獄司各訪名山靈祠委長吏請禱
詔名文德殿南門曰端禮左右長慶隔門曰左右嘉
肅安樂門曰含和宗政殿北橫門曰通極拱宸門裏西

橫門曰臨華 詔入內供奉官吳靖方寄崇儀副使裴

昱寄供備庫副使各降一官殿頭藍從熙以下八人名

罰銅二十斤坐仙韶院火也 著作佐郎范育權檢詳

樞密院兵房文字 廊延路走馬承受賈從禮奏本路

蕃捉生弓箭手死於安南其子幼乞量給口食詔大人

日支一升小兒半升三年住支 御史彭汝礪言太學

試內舍生皆用科場敕式仍乞就景德寺試物論紛紜

雖學者亦不自安也且今日所以紛紛如此者恐考試

不公耳學校風化之地所繫甚大竊聞太學考試舊法亦頗詳悉欲乞但因八年以前舊制稍令加嚴如在工舍更賜加察而才行優異者寵進之詔國子監相度

以聞

科場敕式誰所修此事當考宋本以為無利害又無施行遂刪去今復存之仍增以時政記

丙寅賜皇第六子名傭

哲宗舊名當附初生時賜名恐不須書

詔廣源

州及填乃等處金銀硃砂坑冶令廣南西路經畧司興

置回易

又詔太子中舍前權通判岷州黃察遷一官

知福建縣郭造西華縣令李檉與改京官右侍禁張元

方等五人循資減磨勘年賞鐵城敗果莊之功也 權
荆湖南路轉運副使朱初平言神田等團洞頭首楊光
善等三人來降詔各補三班差使 三司言相度及再
體問商人自來出產小鹽及隣接京東河北末鹽地方
澶濮濟單曹懷州南京及開封府界陽武酸棗封邱考
城東明白馬長垣胙城韋城九縣令通商必為外來及
小鹽侵奪販賣不行合依舊官自出賣仍召客人入中
外其河陽同華解州河中陝府及開封府界陳留雍邱

襄邑中年管城尉氏鄆陵扶溝太原咸平新鄭十一縣
欲且令通商候逐月繳到客交引對比官賣課利不相
遠即立為定法若相遠或起辦年額不敷即依舊官賣

從之

本志刪潤亦可用已
附注二月二十七日

先是張景溫提舉賣鹽

八年閏四

月十八日

頗增鹽價民不肯買則課民日買之隨其貧富作

業為多少之差有買賣私鹽者重賞募人告以犯人家
財充民買官鹽食不盡留經宿者同私鹽法民間騷怨
鹽鈔每席舊直六十至是才二十有餘商不入粟邊儲

失備朝廷疑之召陝西轉運使皮公弼入議其事公弼
極陳官賣鹽為不便詔與三司議之沈括在三司雖不
能奪公弼議然王安石方主景溫括希安石意乃言若
通商則歲失官賣緡錢二十餘萬雖乞將管城等十一

縣并南京孟陝同華衛六州府通商而中書訖不行

此見

九年四月二十八日

安石既去位括始與公弼共言官賣鹽不可

不罷

十年二月二十六日

於是詔許孟陝同華解河中六州府陳

留等十一縣通商餘官賣猶如故云

司馬記聞載張景溫賣鹽事雖多差

誤然不可不入長編今考按前後刪取附見大抵官賣鹽事七年四月二十八日三司先有相度中書不行十年三月十六日再相度乃許河陽同華解河中陝六州府并陳留等十一縣通商皮公弼先於二月二十六日言官賣不得不罷今罷官賣者但此六州府并十一縣耳曹濮澶懷衛濟單南京并陽武等九縣官賣猶如故

己巳試校書郎知崇德縣邢恕復為崇文院校書罷知延陵縣未及赴而縣廢改知崇德亦不赴久之自陳乞開封府界監當差遣特復之初王安石行新法恕謂其子雱曰新法人皆不以為然子盍言之安石怒其罷校

書由此也

恕三年五月十六日罷校書實錄所載與恕本傳不同今從本傳

辛未錄繫囚雜犯死罪降從流流以下第降一等杖以下釋之其雜犯死罪情理重並闕殺情理輕者皆降決刺配千里外牢城 詔權發遣荆湖北路轉運副使徐禧提舉兩浙路常平等事范洵同會計安南行營軍行實費錢帛以聞後禧等言軍事實費錢帛金銀糧草五百一十九萬貫匹兩石束 河北西路提點刑獄司言洺州多盜賊最為難治知州萬頤年老才短乞選能吏以代從之仍詔濟單沂濠洺博淮揚知州軍並中書選

差

明年正月庚午順落差替提刑韓宗道罰銅

壬申詔時雨稍愆令開封府界洎諸路監司分察州縣
檢舉除殄蝗蟲種子法施行無使滋生 神龍衛四廂

都指揮使燕達為鄜延路副都總管先是上批安南行

營軍馬已節次放散可令達赴闕未至而有是命

令燕達赴

闕乃二月二十九日事此據御集除鄜延副總管本傳不書達尋留京師故也

詔右驎驥副

使權沅州東路都巡檢使張整右班殿直權西路都巡
檢劉滋各遷一官西頭供奉官權東路同巡檢王潛等

四人減磨勘年有差以捕殺峴誠等州牯犛蠻功也

詔廣南西路經略司差官瘞安南丁夫輦運軍須死於道者仍加祭奠 詔廣南路緣邊軍事增置遞馬鋪兵減半馬送羣牧司

甲戌都大提舉疏濬黃河范子淵言近聞朝廷以濬川把於汴河試驗有効乞候七八月間水湍急用疏導汴流從之

子淵所言試驗有効當是去年十月二十八日蒲宗孟霍翔等事也

御史蔡承

禧言翰林學士楊繪挾朝廷薦舉之令陰為姦利供奉

官王永年監金耀門紙庫盜官錢百五十萬交結繪等
繪為之奏舉豫許本人閤門祇候臣昨錄問叔兼等罪
已見其狀案繪禁掖近臣不以廉耻自檢未及進用而
豫許小人職名所為如此有辱清班伏乞解繪提舉翰
林二職以俟推劾繪亦言近王永年持執臣受珠事臣
雖曲盡辭理獄官必不肯信事無由明白者不幸在永
年死後也臣舉薦匪人久與之往還受其酒食等物甘
受誅殛至於身為侍從面受永年珠接而懷之臣亦不

敢自明惟乞免追贓依所估錢計贓定罪遠貶重竄永
年既死而其家言永年以官錢市珠遺繪引一從者為
證云於牕隙窺見之獄官詰繪繪耻與吏卒辨即引伏
索其珠則曰焚之矣宰臣吳充言繪為近臣職在提舉
而與永年非類往還受其器玩用此自可貶謫若加疑
似之罪繪今雖不辨安知他日無說遂置珠事不効或
言永年盜賣官文書得錢費於娼家畏其妻知之乃偽
為籍曰買物若干遺某遺某其寔無有也緣繪及竇卞

實嘗過永年家永年妻手搗酒以飲繪卞故兩人不能

自明竟坐責絀

武言據記聞及東軒錄宋本簽貼云遍檢吳充家供到章疏無此語自有聖旨

令不問珠事及免追攝非用充言並削去今復存之

詔諸路走馬承受任滿不

許本路經畧安撫鈐轄司奏舉差遣先是李承之知延

州乞以走馬承受內殿崇班史辯為西路都巡檢兼安

塞寨主上不許仍降是詔

十月庚寅又降指揮

乙亥太常少卿集英殿修撰張芻為右諫議大夫時御

史臺鞠王永年獄案其簿書云嘗以繒帛及酒遺芻芻

不受上聞而嘉之故特遷

此據司馬
光記聞

詔玉牒所皇

子賜名如宗室名同并旁音相犯者更不改 詔都提

舉市易司變法後未賣鹽各依元買鈔價貼納鈔內餘

錢令本司自今依舊賣 權知開封府孫固言本府火

朝廷當正典刑以懲不恪未敢即交職事詔釋固罪府

推官呂希道責監陳州糧料院以火起希道家也 高

陽關路走馬承受王延慶乞令緣邊安撫司精選職員

使臣主掌刺事人樞密院言熙寧七年朝旨緣邊刺事

人多互傳報徼倖賞物人數雖多於事無補可下河北
緣邊安撫司選使臣牙吏有心力諳識敵情者裁定人
數委長吏同募土著可以深入刺事人每事審實以聞
量事大小給錢帛候有符驗再與優賜詔申明行下

戊寅侍御史周尹言提舉賣鹽張景溫擅增鹽價禁賣
蠶鹽苛細害民乞罷景溫職事悉歸之制置解鹽司及

依舊賞格詔景溫具析以聞

朱本云具析到進呈訖無施行合刪今依新本復存

之八月十三日
景溫猶賣鹽

四月辛巳詔復嵐州靜樂縣為憲州以知太原府韓絳言靜樂據汾河大川當岢嵐寧化四達之衝屏蔽太原當置郡屯兵故復之樞密直學士給事中知定州薛

向為工部侍郎再任向辭所遷官降詔不允故事前執政辭官乃降詔兩省降詔自向始也初契丹求地之使久留邸舍數出不遜語邊奏雲應集兵沿涿易道謂北人渝盟有端累詔向察其實向還奏契丹欲速成地界議故多張虛勢以動中國使者懼朝廷不如其請故為

慢言繳幸取成且兵來不除道也後卒如向言 新知

延州呂惠卿乞入朝許之 詔移慶州荔原堡都巡檢

於大順城從環慶路經略司請也 樞密直學士陳襄

等言太常寺主簿黃君俞力學篤行高出輩流博通諸

經多所撰述向舉進士及試經義皆在高等擢為國子

監直講昨以家艱去職除服復用為太常屬官謹身率

職其操彌勵乞置之館閣詔以君俞為崇文院校書

詔以福州常平司檢校崇勝院糧三萬八千餘石賑濟

漳泉州興化軍飢民

癸未中書門下言新科明法及第出身人當年秋以本業試中明法至有循兩資者推恩太優况進士及第不許試經義武舉不許更試武藝今欲應明法及第人試中明法除入第一等合差充刑法官與依例推恩外餘只免試更不推恩銓試經義入等者自依等第推恩從之新知鄆州王克臣言本路號多盜賊乞許以便宜處置從之後詔大名府高陽關京東路安撫司應彊盜

聽便宜處置候盜息如故

甲申詔罷茶場司官賣解鹽

此蓋從周尹之言尹言在九年十一月二十六日

乙酉遼主遣奉國軍節度使蕭儀副使崇祿少卿鄭士

謙來賀同天節 法寺奏開封府司錄司勘到宗室叔

兼叔吳進士秦宏各為私有禁書不全及別制下問報

上不實未奏減等係杖罪緣會疎決釋放從之詔秦宏

送開封府鄆陵縣羈管

丙戌詔諸路緣邊修城濬壕並令軍器監統轄 詔訪

聞昨水利司於淮南收糶下小麥萬數不少却欲出糶
變錢於河北收糶封樁糧斛可契勘見在令即令管勾
官計元糶價如可運致入京比都下市直猶賤即指揮
水利司并淤田司將糶到數目令逐司並津置赴京出

糶

此或與五月一
日王秀事相關

丁亥于闐國入貢

辛卯上批聞諸路皆少雨可令轉運司訪名山靈祠委
長吏祈禱已雨速具以聞監司察刑獄淹延或就近巡

按 詔知欽州西京左藏庫副使劉初邕州永平寨主
供備庫副使楊元卿各遷七資賞招諭廣源蘇茂州首
領功也 詔今後客鹽入京並於市易務中賣本務依
市價收買雖賤每席不得減十貫並畫時支還見錢其
京城內外諸路販賣鹽人並於本務給印歷請買願立
限賒請者聽如私自買賣許人告首等次給賞鹽沒納
入官 會要有此實錄無之二月二十八日四月二十四
日當考本志刪修此段又詔商鹽入京悉賣之市
易務每席無得減十千民鹽皆買之
市易私與商人為市許告沒其鹽

壬辰詔江南西路監司具鹽盜結集因依以聞

癸巳梓州路提點刑獄司言文州蕃賊二千餘人寇邊已逐出界詔利州路提點刑獄司體量因依及城寨有無引匿是與不是疊宕州借助兵馬城寨使臣等毋得輕易別致生事若賊未退或兵甲實不足即關成都府

利州路鈐轄司差務

文州與梓州路何預當考密記亦同

丙申命檢正中書戶房公事安燾體量京東河北官吏不職事以聞其官司行遣盜賊違法事一面施行如事

體稍重即奏取旨以兩路賊盜頗多慮州縣不能逐捕及施行違法故也詔福泉漳州興化軍諸縣第四等

以下災傷五分以上戶去年秋科役錢並放知諫院

黃履言伏見差郭逵判潭州逵至潭日曾布以救命交

割逵輒拒而不從及朝廷以布所奏令逵分析逵至鄂

得之又寄敕於鄂而不受望正其專輒自歸之罪詔郭

逵速赴任仍具析因依以聞

要見後來如何或移附初除時

詔軍器

監置主簿及勾當公事官各一員丞主簿互差從判監

范子奇請也 詔知桂州趙高應接外界邊事奏稟朝

旨不及者許一面施行

丁酉雄州言北界追集兩地供輸南陽頂等五十八村
首領及逃移歸業百五十四戶六百九十七人給賑貸
錢千已牒涿州劾本縣官吏賑貸罪詔雄州體量上件
所貸民戶如委闕食相度具當如何賑濟以聞尋詔兩
地供輸人戶見欠賑濟米豆並除放

五月乙卯
事今并書

賜熙

河路山西軍回弓箭手蕃兵寨戶漢蕃勇敢特支錢戰

歿者賜絹免夏秋稅支移折變如先有功者以子孫姓名聞因戰失馬者買馬給之詔禮部進士依舊試策五道又祖宗袒免親已授官者聽鑠應及非袒免親許應舉國子監及禮部別為一甲試兩場五分為額發解所取不得過五十人殿試與正奏名進士試策別作一項考校累舉不中年四十者申中書奏裁量材錄用戊戌入內東頭供奉官韓永式言廣源等州縣溪洞酋衆悉已降附乞各給朱記詔經略司具當給印記人數

以聞經略司未報上尋棄其地

未及給印棄地
據宋史發貼

禮賓

副使杜師益劉希古三班奉職梅懷德乞商各減磨勘
二年楊斌三年以環慶路經略司言師益等有招安蕃
部之勞也 詔在京見欠市易及諸處官錢人免收禁
聽責保追償 提點兩浙刑獄司安撫張諤奏前知
蘇州沈紳俵糴不如法獄訟滯留至蒙差替詔紳除落
差替

庚子遣官謝雨

新知延州呂惠卿乞不拘常制舉文

臣二員為經略安撫司準備差遣從之 詔判登聞鼓院秘閣校理陳睦衝替坐前任兩浙提點刑獄僱女奴及不按知華亭縣張若濟賊罪雖原赦特責之

壬寅權河北西路轉運判官汪輔之徙東路以輔之與本路轉運使吳審禮相驗定州廩粟論議異同也始輔之按定州支糧封一百十三廩以為麓惡遣官剝估又對軍吏揚言以當貼支卒聞之皆有覬覦薛向曰輔之東南人不習河朔事糧米精麓分數皆故事也安可遽

易乃預召諸將約束且使監官諭之曰汝等所支糧非一日也轉運判官妄有議論明日支請敢有一言者先斬衆皆帖然及朝廷委審禮等相驗卒從輔之

五月壬子具斛

樣當即此事

知鄧州劉忱修鄧均等五州軍城畢降敕獎

諭之三司言相度皮公弼鹽法今參酌前後兩池所支鹽數歲入以二百三十萬緡為額自明年為始從之詔蠲河北東路轉運司所借常平錢糧二十三萬貫石以累年災傷故也內出蜥蜴祈雨法試之果驗詔

附宰鵠祈雨法頒行之

癸卯提舉在京諸司庫務言布庫監官李宗喬等擅離局乞差替上批宗喬等違慢不職可依所奏庶在京官司有所警厲詔故蕃部巡檢趙餘德子三班奉職宗彥殿侍宗傑宗彥等並特給俸仍錄其幼子宗祐為茶酒班殿侍以環慶路經畧司言餘德蕃官嘗有戰功子孫貧弱故也上批李舜舉面奏姚兕捕獲賀富殺人祭鬼證左甚明潭州推治滅裂全出其罪宜下米初平

取案牘看詳別選官劾之既而初平再劾所獲戶乃阿
鄧之夫劉文非賀富殺人也乃止 三司言近奉朝旨
將舊法東南鹽鈔委官於在京等七處置場每席三貫
四百權於內藏庫借見錢二十萬貫應副收買候貼納
到鹽錢遂旋撥還尋令市易務依此收買本務申客人
擁併赴務投下丈鈔據所買計用錢五十九萬三千餘
貫省司全闕見錢深慮有妨鈔法欲將在京客人所乞
中賣丈鈔除單合用鈔別無收附對勘却退令於向西

州軍官場就近勘合中賣外其餘鈔數盡行收買價錢
內三分支還見錢餘七分依沿邊入中鈔價細算合支
價錢目給與新引所有合貼新鈔候降下指揮從省司
牒三班院差使臣一員赴制置解鹽司取撥合銷新鈔
赴市易務下界契勘書填給付客人令於解地請領鹽
貨所貴買盡民間舊鈔兼客人換得新引請鹽趁時變
賣從之其新鈔仍在熙寧十年合出鈔額

會要有此實錄無之二月

二十八日四月十二日二十三日當考初詔京師置七
場買東南鈔而市易務言為錢五十九萬三千餘緡三

司言闕錢頗還其鈔令賣之於西買者其三給錢其七準沿邊價給新引庶盡得民間舊鈔而新引易於變易從之本志如此刪修或即用此

甲辰詔市易務茶限二年結絕許客茶交易上令中書

召嘉問面問之乃降是詔

面問呂嘉問據御集

又詔已差徐禧

會計安南興師費用聞廣西民自供大役之餘極為殫弊令禧具可以寬恤賑補事以聞後禧上賑恤事一曰蠲賦稅減殺人二曰除欠負養孤遺三曰罷折變禁料買四曰放鋪夫省役人五曰計地里省科撥竝從之

河東經畧使韓絳言嵐州合河津並無地與夏國接界乞減寨主量留廂軍五人及廢上下軍十七鋪又上平關雖當把截津要亦阻黃河之險欲止留監押一員軍士三百人從之

乙巳皇第七子賜名价詔戎瀘州沿邊地分夷漢人戶所居去州縣遠或無可取買食用鹽茶農具人戶願於本地分興置草市招集人戶住坐作業者並先於本州縣投狀保明申轉運司差官相度經久可行以聞方

許興置依例出納酒稅課利以本路轉運司所請也

又詔邕州有馬雄略員寮趙秀妻男送湖北配本路軍營充奴婢秀嘗為賊定砲打邕州城也

丙午定州路都監河澤言緣邊山口鋪無捍禦之備近聞敵人滄州小南河寨殺傷老幼剽奪器甲乞應緣邊堡寨委安撫司增築或北界來問即以小南之事為辭最為得策上批緣彼攻劫因而整完其於事機誠不可失令諸路安撫司相度施行

丁未安南招討司言提舉先鋒奇兵將介定等保明富良江接戰及策應有功總三千七十人乞第轉資給賜從之內苗履所部兵嘗過富良江者令趙高詳定履屯郭達西六十里如月渡黃金滿導之過江稟于達而行捷路趨交州十五里達追回將案軍法履具言得達節制乃免交人屯諒州甲洞故履乘虛而行也後依高所定履所部兵過江奪隘及先下江與賊戰四十人遷二資一百三十七人賜絹有差履授子也

依高所定乃五月二十四日事

今并書之黃金滿事九年十二月十二日可考

詔諸路五畝以下保甲更不輪

差赴縣尉巡檢司仍免教閱又詔秦海絳耀華秀溫鄂汀唐知州祁州保定乾寧永寧軍通判並令審官東院選差申中書審察詔以淮南東路坊場錢五萬緡借轉運司為今年冬衣及南郊賞賜鹽本錢以災傷故也

司農寺言勾當公事王覺同江南西路監司提舉司相度興國軍永興縣民每稅錢一出役錢一今減二分詔減五分

是月復冀州棗彊武邑二鎮為縣

舊記但於丁酉書復武邑縣今從實錄

名瀘州小溪口新寨曰武寧